

嘉泰會稽志



1258.2
1258.2
1258.2

嘉慶戊辰重鐫

嘉慶集圖

采鞠軒藏版

序

吾越面斗負溟其山鎮曰會稽夏封無餘秦漢置郡晉以為王國宋梁陳於郡置東揚州至隋改曰吳州大業初改越州尋復為郡唐末錢武肅王兼兩藩節制時升為大都督府宋仍為越州南渡後升為紹興府志成於通判施宿在嘉泰元年陸游為之序先是直龍圖閣沈作賓為守初始纂輯華文閣待制趙不迹寶文閣學士袁說友等相繼為之而宿實始終其事用長安河南成都相臺諸志例稱會稽志後二十五年張浚以事物沿革今昔不同彙次嘉泰辛酉後事為會稽續志復於前志有所補正成於寶慶元年兩書為宋志之最向所盛稱顧世少傳本見於著錄者僅許氏鑑止水齋藏有原刻本明正德五年重刊本亦不多見即清嘉慶時采鞠軒本並散播

寢稀及今不圖後將淪亡甚可憫也爰與周
君養菴取采鞠軒本影印流傳比年各省風
行修志是志體例足資取法固不獨津逮越
人源流可溯也夫讀書與藏書異每竟一編
貴具特識昔李越縵先生究心鄉邦掌故於
是志一再研索嘗謂志中有氏族攷關係鄉
里文獻甚鉅且以清流品別僑籍隱寓九品
中正之法此意可師又謂志引會稽先賢錄

之陳業與三國志虞翻傳注引會稽典錄及
水經漸水篇注之陳業竝是一人後來府志
於孝行引先賢傳之陳業於隱逸引典錄之
陳業以為兩人誤矣閱會稽掇英集云唐太
守題名記王奉慈永徽二年正月自潭州都
督授五年拜秦州都督案此必是勃海王奉
慈高祖兄蜀王湛之子也舊唐書隴西王博
人傳言奉慈顯慶中為原州都督薨諡曰敬

時代正合惟史文從畧止言其所終之官耳
此記據宋時石刻誤作王奉慈嘉泰志踵
其誤以後諸志遂皆從之老輩讀書精審片
辭足寶埶綴於茲備後之修志者有所攷焉
中華民國十五年五月里人王家襄序

會稽志序

昔在夏禹會諸侯於會稽歷三千歲而我

高宗皇帝御龍舟橫滄江

應天順動復禹之迹

駐蹕彌年

定中興之業羣盜削平強虜退遁於是用唐幸梁州
故事陞州爲府冠以紀元

大駕旣西幸而府遂爲股肱近藩稱東諸侯之首地
望蓋視長安之陝洛汴都之陳許所命牧守皆領浙
東安撫使其目丞相執政來與去而拜丞相執政者

會稽志序

不可遽數而又

昭慈聖烈皇后及

永祐以來四陵櫟殿相望於鬱葱佳氣中朝謁之使
艫銜轂擊中原未清今天下鉅鎮惟金陵與會稽耳
荆揚梁益潭廣皆莫敢望也則山川圖謨宜其廣載
備書顧未暇及者縣數十年直龍圖閣沈公作賓來
爲守慨然以爲己任而通判府事施君宿發其端安
撫司幹辦公事李君兼韓君茂卿爲之助郡士馮景
中陸子虞王度朱鼐永嘉邵持正等相與上參禹貢
下考太史公及歷代史金匱石室之藏旁及爾雅本

草道釋之書稗官野史所傳神林鬼區幽怪恍惚之說秦漢晉唐以降金石刻歌詩賦詠殘章斷簡靡有遺者若父老以口相傳不見於文字者亦閒見層出積勞累月乃成沈公去爲轉運副使猶經營此書不已華文閣待制趙公不述寶文閣學士袁公說友繼爲守亦力成之而始終其事者施君也書雖本之圖經圖經出於

先朝非藩郡所可附益乃用長安河南成都相臺之比名會稽志會稽爲郡雖遷徙靡常而郡本以山得名又禹所巡也故卒以名之既成屬游參訂其槩且

會稽志序

二

爲之序嘉泰元年十二月乙酉中大夫直華文閣致仕賜紫金魚袋陸游序

會稽志目錄

卷第一

越

會稽郡

越州

紹興府

歷代屬州

歷代屬縣

廢州

廢縣

分野

風俗

州境

城郭

子城

學校學教授直舍

縣學

社

縣社

貢院

古城

教場

僉廳

府廨

西園

會稽志目錄

一

卷第二

王

都尉

內史

太守

守鄉郡

卷第三

節度使

安撫使

都總督

提刑

提舉

通判

路鈐轄

正副將

都監

三司屬官

職曹官

縣令長

進士

姓氏

軍營

軍額
弓兵

倉庫

場務

館驛

衢巷

郵傳

獄

市

堰

閘

斗門

卷第五

貢賦

課利

戶口

雜貢

和買

卷第六

陵寢

濮王園廟

大禹陵

祠廟

冢墓

會稽志目錄

二

卷第七

宮觀

寺院

卷第八

寺院

戒壇

卷第九

山

卷第十

水

湖

隄塘

池

潭

海潮

卷第十一

泉

井

洞

石

津渡

橋梁

卷第十二

八縣縣境

官廨鎮市場務附

卷第十三

鏡湖

守禦

討賊

平亂

社倉

義田

節序

送迎

義門

園池

古第宅

古器物

漏澤園

義翁

會稽志目錄

三

卷第十四

人物

經學

文章

節義

孝行

隱遁

貞婦烈女

卷第十五

宰輔

侍從

神仙

高僧

伎術

卷第十六

翰墨

碑刻

求遺書

藏書

卷第十七

草木蟲魚鳥獸

藥石附

紙

鹽

日鑄茶

布帛

卷第十八

拾遺

卷第十九

雜紀

卷第二十

古詩文

會稽志卷第一



越

越在唐虞時禹平水土制九州而越爲揚州之域職方氏東南曰揚州其山鎮曰會稽釋云會稽在山陰舊經云塗山在山陰縣西北禹會萬國之所在左傳哀公七年魯大夫曰禹合諸侯於塗山執玉帛者萬國杜預注云塗山在壽春東北說者遂疑塗山非會稽今塗山之名有四會稽壽春之外復有淪州之塗山杜子美賦禹廟詩者文字音義云音塗山占國名夏禹娶之今之宣州當塗縣也杜預獨指壽春之塗

會稽志卷一

一

山爲禹合諸侯之地宜必有據然按史記夏本紀贊曰禹會諸侯江南計功而崩因葬焉命曰會稽會稽者會計也裴駟注引皇覽曰禹冢在山陰會稽山上會稽山本名苗山在縣南去縣七里越傳曰禹到大越上苗山大會計爵有德封有功更名苗山曰會稽家語孔子曰昔禹致羣臣於會稽之山防風氏後至禹殺而戮之其骨專車封禪書曰禹封泰山禪會稽由是論之禹既合諸侯於會稽庸詎知魯大夫所謂塗山非會稽與至夏后氏少康封庶子於會稽以奉守禹之祀文身斷髮披草萊而邑焉後二十餘世至

於允常允常之時與吳王闔閭戰而相怨伐允常卒
子句踐立是爲越王舊經云春秋貶之號爲於越案
春秋定公五年書於越入吳杜預曰於發聲也西漢
書云太伯初奔荊蠻荊蠻歸之號曰句吳顏師古云
句吳亦猶於越也太伯至德初無貶詞特從其俗爾
公羊云於越者未能以名通也穀梁范氏注云春秋
卽其所以自稱者書之然竊有疑焉越於是時猶未
預中國會盟未嘗與中國通也經書於越入吳非越
自稱明矣豈書於經者乃吳王告同盟之詞與哀公
二十一年越人始來二十三年魯始使越據此可知

且以句踐爲君而種蠡爲臣果未能以名通者乎定
公十四年吳伐越越子句踐禦之陳於檣李句踐患
吳之整也使死士再禽焉不動使罪人三行屬劍於
頸而辭曰二軍有治臣奸旗鼓不敏於君之行前不
敢逃刑敢歸死遂自剄也師屬之目越子因而伐之
大敗之靈姑浮以戈擊闔閭闔閭傷將指取其屨
還卒於陘去檣李七里夫差使人立於庭苟出入必
謂已曰夫差而忘越王之殺而父乎則對曰唯不敢
忘三年乃報越哀公元年吳王夫差敗越於夫椒報
檣李之役也遂入越越子以甲楯五千保會稽使大

夫種因吳太宰嚭以行成吳子將許之伍員曰句踐能親而務施施不失人親不奔勞與我同壤而世爲仇讎姬之衰也日可俟也介在蠻夷而長寇讎以是求伯必不行矣弗聽三月越及吳平吳越春秋謂吳封地百里於越國語曰句踐之地南至句無今諸句無北至於禦兒今嘉興有禦兒鄉西漢功東至於臣表兩粵傳有語兒侯鄞西至於姑蔑今太末地也廣運百里句踐乃與范蠡深

謀二十餘年竟滅吳報會稽之耻北渡兵於淮以臨齊晉號令中國以尊周室致貢於周周元王使人賜句踐胙命爲伯諸侯畢賀乃徙都琅邪漢書地理志

云琅邪越王句踐嘗治此起館臺有四時祠吳越春秋亦云越王於此起觀臺周七里以望東海句踐卒子王鼫與立王鼫與卒子王不壽立王不壽卒子王翁立王翁卒子王翳立王翳遜國逃於巫山之穴越人薰而出之王翳遜國之賢君蓋吳太伯之儔也王翳卒子王之侯立王之侯卒子王無疆立案此句踐至無疆寔六世舊經云五世者誤也王無疆時興師北伐齊西伐楚與中國爭疆當楚威王之時越北伐齊齊威王使人說越王於是越遂釋齊而伐楚楚威王興兵而伐之大敗越殺王無疆盡取故吳地至浙

江北破齊徐州而越以此散諸族子爭立或爲王或爲君濱於江南海上服朝於楚後七世至閩君搖佐諸侯平秦漢高帝復以搖爲越王以奉越後東越閩君皆其後也

會稽郡

秦始皇二十五年大興兵使王翦遂定荆江南地降越君置會稽郡治吳二十六年初并天下用廷尉李斯議分天下以爲三十六郡郡置守尉監郡守掌治其郡有丞尉掌佐守典武職甲卒監御史掌監郡漢興高皇帝六年以其地封劉賈爲荆王黥布反荆王

會稽志卷一

四

賈死之無後十二年封劉濞爲吳王王三郡五十三城孝景帝四年吳王濞反誅乃復爲會稽郡越絕外傳曰漢孝景五年會稽屬漢屬漢者始并之也舊經云後復屬江都國江都王建有罪國除乃更爲郡案漢書地理志廣陵國注江都易王非廣陵厲王胥皆都此并得鄣郡而不得吳劉貢父云然則會稽不得云屬江都也吳朱育以強記稱且距漢未遠仕本郡門下書佐太守濮陽興問漢封諸侯事而育所對亦止言劉賈爲荆王濞爲吳王濞誅乃復爲郡治於吳亦不及屬江都事也前漢志領縣二十六後漢順帝

永建四年分浙江以東十四縣爲會稽郡治山陰東
晉爲會稽國改太守爲內史宋武帝永初二年罷會
稽郡府復爲會稽郡齊梁陳因之隋爲吳州改越州
尋罷州爲會稽郡依漢制置太守以司隸刺史相統
治唐武德四年爲越州天寶元年復爲會稽郡乾元
元年復改爲越州

越州

越州隋大業置古會稽郡也因國爲名置刺史焉按
漢武帝紀元封五年初置刺史部十三州顏師古曰
漢舊儀云初分十三州假刺史印綬有常治所以秋

分行部所察六條秩六百石於是乃復禹貢九州之
名而增以周之幽并與漢所開之朔方交趾以爲十
三州也會稽自昔常隸揚州晉王羲之爲會稽內史
王述爲揚州牧檢校郡事羲之恥之求分會稽爲越
州不果遂稱疾去郡誓墓終身不仕其後至隋而會
稽卒爲越州蓋本於此宋齊梁陳會稽自爲東揚州
刺史不復受察於揚州雖寢異古制然猶未至盡廢
刺史之職或以刺史行太守事如曰東揚州刺史領
會稽太守是也隋制舊有兵處刺史帶諸軍事以統
之如曰都督會稽等郡諸軍事是也或加使持節隋

唐而降支郡皆稱刺史但領一州而以州統縣與他州等故又於此置總管府以統其屬州隋文帝初平江南改曰吳州大業中遂改爲越州尋罷州置郡以刺史十四人巡察畿外諸郡所察六條略如漢制唐武德四年復爲越州置總管領州如故未久改總管爲都督自是改更不常郡則曰太守州則曰刺史其實一也至乾元元年遂爲越州大抵越州其實與會稽郡同非復如漢十三州之重刺史亦非復古之部刺史但以總管都督踰制一道爾

紹興府

建炎三年十月庚申

車駕自杭州巡幸 御樓船渡浙江壬辰 幸越州
四年四月癸未 御舟自溫台回 駐蹕越州明年
正月一日改元紹興越州官吏軍民僧道上表乞
賜府額昔唐德宗以興元元年巡幸梁州改梁州爲
興元府於是 朝廷用興元故事改越州爲紹興府
初

車駕幸揚州 駐蹕逾年又嘗經郊祀然未嘗建爲
府則紹興蓋 特恩也

車駕旣 移蹕臨安首命前叅知政事資政殿學士